



CHRISTINE VAN WYK TOERE
vir die fynproewer

CHRISTINE VAN WYK-TOERE

(EDMS) BPK
REG NR 94 01824/07

Oktober 2021

RUSLAND SONDER PASSIESPEL

09 – 21 Julie 2022

TOERPROGRAM

Julie

Sa 09 JOHANNESBURG

Toerlede ontmoet om **16:00** op die O.R. Thambo-lughawe by **Lufthansa** se inweegtoonbank vir vlug **LH 573** wat om **19:00** na Frankfurt vertrek.

So 10 FRANKFURT – MOSKOU

Ons land om **05:35** in Frankfurt, vanwaar ons om **08:05** met vlug **LH 1444** na **Moskou** vertrek vir aankoms om **12:15** op die Domodedovo-lughawe.

Ons Russiese gids wag ons op die lughawe in Moskou in en vergesel ons per bus na die MS Rublev – ons 'tuiste' vir die volgende paar dae.

Moskou is die hoofstad van Rusland, die grootste land ter wêreld. Hierdie eens magtige keiserryk is al meer as 850 jaar oud en ontwikkel steeds binne 'n vinnig-veranderende politieke en ekonomiese klimaat. Moskou word beskryf as 'n stad wat bestaan uit 'n pragtige samesmelting van oud en nuut, vreemd en bekend, verval en sprankel!

Ná aankoms by die boot en registrasie by die ontvangs kan ons uitpak en ontspan totdat aandete voorgesit word. Vir die res van ons verblyf op die boot word drie etes per dag verskaf.

Ma 11 MOSKOU

Vanoggend onderneem ons 'n **stadstoer** van Moskou. Daarna besoek ons van die onbeskryflike mooi **ondergrondse metro-stasies** en spandeer tyd in die bekende **Arbat-sstraat** in Moskou vir inkopies.

Indien daar 'n vertoning is, kry toerlede vanaand die geleentheid vir 'n opsionele besoek aan die Moskouse sirkus. 'n Opsionele busuitstappie genaamd *Moscow by night* is ook beskikbaar en gewild onder toeriste.

Di 12 MOSKOU

Ons ervaar iets van die Russiese argitektoniese kultuur- en kunsskatte tydens 'n besoek aan die **Kremlin** – setel van die Sowjet-regering en vroeëre paleis van die tsaars. Hierdie 25 hektaar ommuurde area huisves katedrale, paleise en administratiewe geboue, onder andere die Kremlinpaleis, die Katedraalplein, Iwan die Grote se Kloktoring en die Wapenkamer (*Armoury*), waar 'n besondere versameling kroonjuwele en skatte van voormalige tsaars vertoon word. 'n Besoek aan die wapenkamer is by die toerprys ingesluit. Daar word ook tyd op die Rooiplein (400 m lank en 130 m breed), oftewel die hart van Moskou, deurgebring. Die St Basilius-katedraal oorheers die een kant van die plein. Regs van die plein is die Kremlinmuur en voor die muur Lenin se musoleum van rooi en swart marmor.

Die boot vertrek vanmiddag na **Uglich**.

Let wel: Die volgorde van die program in Moskou kan verander.

Wo 13 UGLICH

Uglich, wat uit 1148 dateer, is een van Rusland se mees geliefde stede. Die meeste uitstappies in Uglich konsentreer rondom die ou Kremlin met talle antieke geboue aan die waterfront. Aan die einde van die 16de eeu het Maria Nagaya, Iwan die Verskriklike se vrou, in ballingskap in die Kremlin van Uglich gewoon. Die fassinerende rooi Kerk van St Dmitry, wat ná die heiligverklaring van die vermoorde Tsarevich Dmitry gebou is, staan hier naby. Uglich se oudste gebou, die Paleis van Tsarevich Dmitry, is ook hier te sien. Ons vertoef ongeveer drie ure in Uglich. Die straatstalletjies is 'n fees vir die oog, en ervaring het geleer dat aankope en aandenkings hier van die goedkoopste in Rusland is. Die boot vertrek om **18:00** na Yaroslavl.

Do 14 YAROSLAVL

Om **08:00** vanoggend arriveer ons in **Yaroslavl**. Ons onderneem 'n stadstoer deur hierdie 1 000 jaar oue handelstad wat oor 'n afstand van 26 km langs die oewer van die Wolgarivier strek.

Van die belangrikste besienswaardighede is die manjifieke Spassky-klooster en die Kerk van die profeet Elia, wat 'n unieke versameling ou Russiese muurskilderye (fresko's) huisves. Die handjievul manne wat vir besoekers in hierdie kerk sing, is 'n belewenis wat 'n mens lank bybly.

Daar is ook geleentheid om tussen die straatstalletjies rond te drentel en eg-Russiese handwerk en aandenkings te bewonder of te koop.

Vr 15 GORITSKY KIRILLO

Vandag het ons geleentheid om meer van Rusland se binneland te sien terwyl ons per bus na die nabygeleë **Goritsky Kirillo** ry. Dit is een van die interessantste stede van die Karelië-republiek. Die eenvoudige leefwyse van die inwoners is opvallend: Hulle leef van die grond af, elkeen met sy/haar eie groentetuintjie. Ons besoek onder andere die Belozerski-klooster, een van die grootstes ter wêreld. Straatstalletjies met snuisterye word volop aangetref.

Sa 16 KIZHI-EILAND

Hierdie klein eilandjie word via die Wolga-/Baltiese kanaal bereik en is 'n fees vir die oog! Ons meer om ongeveer **14:30** by Kizhi vas. Veral die suidelike punt van **Kizhi-eiland** word gekenmerk deur talle kerke, kapelle, kloktorings, plattelandse huisies, graan- en ander skure en windmeulens – 'n versameling wat duidelik die styl en argitektuur van Noordelike Rusland uitbeeld. Die hele eiland is 'n opelugmuseum. Die 'Kerk van Verheerliking' het 22 houtkoepels en is die toppunt van die Russiese sprokiesargitektuur!

So 17 MANDROGY

Vandag beleef ons 'n ontspanne atmosfeer en leer ken meer van die Russiese platteland in **Mandrogy**. Indien die weer dit toelaat, word ons met 'n tradisionele Shashlyk-braai in die buitlug onthaal, afgerond met eg-Russiese volksvermaak. Ons besoek onder andere ook toonkamers waar vroue tipiese Russiese handvlyt, soos die allerfynste kantwerk en die maak en verf van matrushka-poppies, beoefen. Ons hou vanaand konsert en as die weer saamspeel, hou ons middernagfees op die bootdek om die middernagson, wat eers ná **23:00** ondergaan, te aanskou!

Ma 18 – Di 19**ST PETERSBURG**

Met 101 eilande, 66 kanale en honderde brûe is St Petersburg (of Leningrad, soos dit vroeër genoem is) een van die wêreld se elegantste stede! Die skoonheid lê in die vermenging van Oosterse en Westerse argitektuur en kuns. Vanweë die stad se ligging op 'n netwerk van riviere, eilande en die see, staan dit ook as die 'Venesië van die Noorde' bekend.

Oor die volgende twee dae kry ons geleentheid om hierdie pragtige stad goed te verken. Ons skop af met 'n begeleide **stadstoer** van dié merkwaardige stad en besoek o.a. die kolossale **St Isaac-katedraal** – 'n ongelooflike ingenieurswonder.

Ons besoek ook die internasionaal bekende **Hermitage-museum**. Hierdie museum bevat die grootste versameling kuns- en antieke werke ter wêreld, wat verklaar waarom dit as die 'Moeder van alle Kunsmuseums' bekend staan. Dit is slegs die Louvre in Parys en die Prado in Madrid wat met hierdie museum kan wedywer.

Dié museum was vroeër die Winterpaleis, waar die laaste ses tsaars gehuisves is. Ons besoek **Peterhof** – een van die tsaars se weeldepaleise – met indrukwekkende tuine en 'n goue spuitfontein.

Een aand woon ons 'n **folklore-vertoning** by. Die kaartjies hiervoor is reeds by die toerprys ingesluit. Daar is ook geleentheid vir 'n opsionele balletopvoering (indien daar 'n vertoning is).

Wo 20 ST PETERSBURG – met aansluitingsvlug na JOHANNESBURG

Ons ontskeep ná ontbyt. U kan vir oulaas inkopies in die stad doen en ons sluit die toer af deur middagete in 'n eg-Russiese restaurant te nuttig. Ná middagete neem ons bus ons na die lughawe in **St Petersburg** vir ons vlug (LH 1437) wat om **17:50** vertrek en om 19:45 in **Frankfurt** land. Vlug LH 572 vertrek om **22:05** en neem ons terug na **Johannesburg**.

Do 21 JOHANNESBURG

Ons land vanoggend om **08:30** op die **O.R. Tambo-lughawe** ná 'n onvergeetlike ervaring.

NB: Die toerprogram is aan veranderings buite ons beheer onderworpe.